

左
海
文
集

隱屏山人陳編脩傳

儀徵阮元撰

陳壽祺字恭甫號左海閩縣人父鶴書以天學玉講

仙遊龍巖邵武泉州漳州上杭書院皆有經法有詩

集數卷事實詳元所撰墓志中壽祺五歲讀書易於

成誦舉止端重性靜且敏成童卽淹貫羣籍一覽輒

解文藻博麗有六朝三唐風格其鄉先生陳秋坪謂

之曰當以千秋自命勿爭名一時年十八值臺灣林

爽文之亂有海外紀事詩見之者歎曰此諸將嗣音

也洎嘉勇福公平臺凱旋其參軍郭公卽壽祺母之

傳

族叔屬代撰上嘉勇公百韻詩并序沈博絕麗一時
傳誦稱爲才子其序一篇今刊集中武進張惠言讀
之曰擬之燕許何多讓焉年十九乾隆己酉科舉於
鄉嘉慶己未會試中式

賜進士出身會試闈中其卷爲人所遏元言於朱文
正公曰師欲得如博學鴻詞科之名士乎閩某卷經
策是也遏者猶摘其四書文中語元曰此語出自虎
通於是文正公由後場力拔出之旣選館職文正公
愛其才重視之在都下以經術文章與同年武進張
惠言全椒吳鼐歙鮑桂星高郵王引之齊名辛酉散

館授編脩請歸省親會元巡撫浙江延主講杭州敷
文書院兼課詁經精舍生徒元脩海塘志且纂經
古義爲經郭壽祺皆定其義例焉癸亥冬入都甲子
典試廣東丁卯典試河南己巳會試房考所得多知
名之士張岳崧劉光三其尤也其衡文嶺南中州也
二三場遺卷一二萬盡閱之在都十年恬然寡交遊
惟日以討論經義爲事同年數人知而愛之相待如
昆弟又及見碩儒錢竹汀段懋堂王懷祖程易疇諸
先生故學益精博中嘗被公卿論薦京察書上考擬
陪南書房俄以丁父憂歸時庚午歲也初壽祺將

以是歲逾秋告歸省親未幾遽丁憂星奔痛鉅乃自
悔其在都之非其所述至令人不可卒讀時年方四
十卽抱退志矣服闕陳情乞養母主泉州清源講院
者十年與諸生言脩身勵學教以經術多士奮興一
洗空疎之習嘗正定清源書院先賢祀位並率諸生
增置祀產以資祀事奉朱子於東舍從以先賢之傳
道而祀鄉學者明蔡文莊公張襄惠公次崖林氏紫
峯陳氏紫溪蘇氏慕蓼王氏素菴林氏

國朝李文貞公凡八君子位左右扁曰先覺祠爲之
記陷石壁間丁母憂後終於家居主黿峯書院講席

者十一年剏立規約整肅課程每月兼課經史文筆
其教士以崇廉恥踐禮法研經術爲尙作義利辨知
恥說科舉論以示學者士始畏其束縛漸安之久之
悅服不能忘公卿間有以名薦者終不出計自丁父
憂後養母十年去官二十餘載里黨義舉多爲之倡
若省會 文昌祠 大成殿 廡明倫堂 恤廢賑厥貢
院號舍東西湖水利莫不首其議與諸同志成之桑
梓利弊蒿目痍心往往直陳於大吏冀獲挽救雖間
櫻逆耳之怒弗恤也壽祺志在表揚先賢以漳浦黃
石齋先生之孤忠絕學久欲請祀 孔子廟道光四

年遂偕紳士呈於督撫曰明儒漳浦黃公道周行完忠孝學貫天人著述本乎六經節義興乎百世建言直諫斥佞黜邪蒙難捐軀詠歌弗輟浩氣足以塞天地正性足以扶綱常其德業在梁溪考亭之間其志節在文山青陽之列其發明聖學衛道宗經大旨與劉公宗周相近是以榕壇叢山並峙宇內非獨出處節概兩相頡頏今劉公旣崇祀西廡請並黃公從祀以彰名臣之軌範樹儒宗之圭臬正人心而維世教翼聖道而勵貞脩實有光於國家庠序之典總督趙文恪公巡撫孫文靖公躋之卽屬壽祺代撰疏稿

壽祺因謂明史黃道周傳贊稱其所陳深中時弊足
爲萬世龜鑑

御批通鑑輯覽紀其學行推重於天下乾隆四十一年

特賜專謚忠端其生平著述尤富 四庫採錄其書
多至十種皆闡明經旨推究治道而尤深於易經孝
經其講學恪守朱子道脈遂本此意成疏稿督撫會
疏請從祀東廡明年春禮部議如所請秋八月大吏
率文武吏奉主入祀 孔子廟時方鄉試鄉士大夫
及青衿千餘人相從行禮其扶翼名教如此壽祺又

以黃忠端公所著經解九種及榕壇問業咸已著錄
四庫經解雖久經刊行其餘遺書文集散見未及進
者尙多於是積十餘年蒐訪之力購得易本象鄴山
講義駢枝別集大滌函書及公門人石秋子洪思與
莊起儔所撰黃子年譜又得漳州士人藏本海澄鄭
白麓中書所編公文集三十六卷詩十四卷又假得
公季子子平所編公全集原本校對補遺數十編彙
成全集重定目錄輯爲五十六卷訂以年譜謀於總
督孫文靖公刊布之閩省通志舊志多誤六十餘年
文獻散失請加纂勒督撫從之壽祺乃爲之勅立義

例採訪事實舉才者分任之而自總其成書成而病
以道光十四年春卒年六十有四壽祺解經得兩漢
大義每舉一義輒有折衷上溯伏生下至許鄭靡不
通徹所著有五經異義疏證三卷尙書大傳定本三
卷洪範五行傳輯本三卷左海經辨四卷左海文集
十卷左海駢體文二卷絳跗堂詩集六卷東越儒林
文苑後傳二卷又著歐陽夏侯經說考魯齊韓詩說
考禮記鄭讀考兩漢拾遺遂初樓雜錄元選其五經
異義疏證左海經辨及文集中之說經者入 皇清
經解壽祺雅慕武夷山水紫陽精舍晚年自號隱屏

山人作隱屏山人傳疾時不穀食卻醫藥惟日啜武夷巖茗噉柑柚少許枕上作絕句云夢想仙巒二隱屏問天應著少微星人間無此溪山好便欲乘雲上幔亭詞意恂怳若有所會子三喬樅道光乙酉舉人朝樞鴻棟喬樅等訃來滇請爲墓志元不爲志而爲之傳時甲午六月

論曰山人以強仕之年告歸養親可謂孝矣親終不復仕非如羲之誓墓有所激也恬而已矣立身於道義之中而經學博通兩漢文章雅似齊梁其學行卓然傳矣以千秋自命不爭名一時秋坪之言諒哉

儀徵阮官保尚書札 道光元年

夏初接到手翰具稔堂上康健年兄近社安和為慰
林下愛日正長恬然於經史文藝之中心安理得此
乃真道學非末流空講象山之派所知也生近來將
冑中數十年欲言者寫成性命古訓一卷大抵欲關
李習之復性之書而以書召誥節指為主少暇當再
鈔寄又論仁論二卷奉政此內廬山一段乃千古學
術關鍵不足為外人道也尊作詩文五帙恐失其稿
今交閩副將桓格親為奉還其中文體詩格皆沈著
詰實無一豪浮虛之習洵為近今大家不第閩省所

罕也生之十三經注疏校勘記昔刻於廣東而今反少印本十八年在江西江西人請刻宋本十三經盧浙之弟宣旬採記於每卷之後刻之所採未全然切要各條亦無不具矣此書板在江西學官他日買得交閩便奉寄生在此一切尚安靜閩粵交界洋面疊次獲夥盜近亦靖矣但時時須急辦蓋少縱即逝者也潮州鬥匪近亦緝辦數百人十得八九以後此風可以少斂碧山到此甚好惟初下車過於用心未免勞勩近患痢頗委頓粵中學術故不及閩近日生於書院中古學海堂加以經史雜課亦畧有三五佳士

矣肅此奉復不具四月晦日生阮元頓首

德清許周生駕部札

宗彥

嘉慶己巳

夏間得手示得稔道履清吉翱翔館閣平進卿貳較之諫苑監司更於儒雅為近所私頌者亦在此不在彼也陳司馬返浙見大著李忠毅神道碑筆堅詞邃有初唐人風格佩服佩服并見芷沅同年詩亦極古雅宗彥比來百事嬾惰學問毫無所益念之殊自媿耳閣下欲著之書已成一二種否近時兼詞章經術而有之且各極其精者惟閣下深細古茂實逾於竹垞董浦兩君不朽之業斷在是矣宗彥前與王穀旆

談及舜典食哉惟時篇中惟時懋哉惟時亮天工兩
惟時皆屬下讀不應此次獨屬上讀穀滕欲從雅詁
以為訓食兩字為句宗彥謂史記述此節乃論帝堯
之德當以欽哉發端篆體金字與食字相近或由欽
字蝕其半存其半遂謔作食耳質諸左右以為何如
宗彥頓首

寶應朱詠齋侍郎札 士彥 道光五年

大著說經者詳贍精卓虎觀石渠之議敘事謹嚴所
采擷止於范陳不闌入晉書以下語論時事皆洞中
窺曲賅貫原委其他作綺麗醇厚東京之遺也盥誦

再四敬服敬服不揣固陋擇其尤愜於心者妄以賤
字鈐識並錄存其目有一二獻疑者亦發述鄙意侍
少時亦嘗治經與小學少窺其門徑竊見百八十年
來通儒踵相接書詩禮春秋無不宣之蘊聲音文字
訓詁無不抽之祕兩漢以後得未曾有雖竭吾之聰
明才力欲有所為其不可以廁一席於諸賢之側章
章矣文章三代兩漢以下千餘年間不過數人從事
於此或望有所成就往年見大箸非所能及則又廢
然返矣邇者率以巳午時在署治官文書歸則神思
已罷不復能力於學置此身於天下與背毛腹毳何

異老前輩其何以教之侍士彥頓首

龍巖饒嘯漁貢士札 廷襄 道光二年

蒙示大集數日枕藉其間雖羈旅溷雜心氣浮囂不能有所探討然嵩華之為高江海之為深不待智者而後曉竊見揚馬之與鄒枚文藻殊艷匡劉之與鄭許經術異家囊括衆有合為一人於太夫子見之矣欲人勤攻吾闕集思廣益誠大賢君子之處心非淺隘小儒所庶幾然以窮鄉晚進目不覩 四庫之書學未窮一家之奧乃欲於大君子前吐露愚款妄肆論說得無疑屬非其人而使後世於太夫子有失言

之譏乎能譏彈陳思之文者必其去陳思不遠否則
景升豚犬耳歐陽文忠每一文成以示謝景純輒能
解其深處甚歎其不易得此則襄之所勉企焉而今
亦不敢輕於芻獻也欲并二傳稿手錄以歸時時展
讀偶有窺尋亦冀附姓名集中故尚欲留案頭枕中
鴻寶茲行殊復自豪太夫子其亦許之乎小門生廷
襄頓首

光澤高雨菴舍人札

澍然

道光五年

尊箸循環諷誦歎其浩如淵海純如金玉精實如布
帛菽粟蓋合德與功見於立言者也豈末學所能測

識哉雖然澍然治古文有年頗能言其升降利病竊以為國朝諸公如魏冰叔之囂汪荅文之荅方望溪之矜劉海峯之放憚子居之野皆忝古文道遠而冰叔尤甚識鄙而氣妄且喜作態悅時目殆古文之蠹也侯壯悔姜湛園姚姬傳稍治氣格矣而侯未醇姜未固姚亦未克皆非其至也惟朱太史梅厓上接震川其昭代一人乎然亦有缺於人心者經術疎而實用少志局於文而性不足於仁也今尊箸淪浹經術而於人心世道若機於中而不能自己足以補梅厓所未備澍然以為合德與功見於立言者非

過也其氣格高者近習之子固時摩韓壘

計四十篇
另紙錄呈

次不失為劉原父虞道園方希直其考據之文絡以
真氣亦高出全紹衣錢竹汀諸君子而詞章則上規
中郎子建下抗休文彥昇矣澍然謹遵謙旨精選百
三十篇偉人盛業照耀百代而德清許駕部擬諸道
古堂集夫道古堂真今文耳何得言古文駕部於是
失言矣大抵 昭代古文嫡系在吾閩前有梅屋今
又得先生克其所至固齊驅並駕即友人張怡亭友
拙著亦思如駮之靳未知先生肯容分一壇坫作滕
薛小侯否也尊著百三十篇已臻大醇中有未安處

荷知愛之厚不避僭妄加注於旁死臯死臯外拙撰
論語私記呈正澍然見聞淺狹有前人已及者希為
注明并懇駁正紕繆是望澍然頓首

左海文集卷一

福州陳壽祺葦仁

聖駕臨幸翰林院禮成恭紀

重華稽古頌一首

皇帝御天下之九載八紘鷄居萬役雉夷羿兪九嬰
之孽既蕪乃相與息馬投戈論道講藝游登闕監
成憲揆文者闡繹乎萬世二月吉亥

幸翰林之署循乾隆甲子故事也臣聞君莫崇於堯
舜尚書堯典曰粵若稽古說曰順攷古道也或曰稽
同也古天也言能順天而行之與之同功也尚書中

卷一
一
候曰若稽古帝舜曰重華欽翼皇象說曰重華者舜翼奉也言舜敬奉皇天之運數也或曰華謂文德言其光文重合於堯俱聖明也由是論之舜之稽古同乎堯所以同乎天也顧虞書間闕匪獨逸九共汨作故倣唐之文畧焉

聖清龍興世以闡苞甄曜經緯乾坤橫被四表天聰以來崇儒術恢茂典建

國史祕書宏文之院定學士讀講編檢之秩

賜西苑瀛臺內殿之宴越

高宗純皇帝親幸玉堂鋪之鴻藻炳炳烺烺今

皇帝纘

洪基奉

上則熙亮采首唱為詩曰丕承

考訓欽

文思誠順攷古道而行矣天之運六十載而復始今
青龍左行周五紀歲德再叶文明以昌其為奉

天也精矣其為同

天也尚矣蓋唐先孕虞舜嗣堯猶子嗣父故夫放勳
欽明文憲晏晏之徽非舜罔紹

純皇聰明光宅隆興煥炳之式非

聖上罔祿厥表臣伏維

皇帝善繼善述法度貞教化嫩禮樂昭文章蔚乃悉
推本於

孝思之至巍巍乎與舜之稽古一揆也鋪觀伊祁之
治素題不朽土階不殫舜未之有易也然靈臺總章
上庠下庠法度焉弛而弗張懿夫龍馬銜甲赤文綠
錯玉檢金繩之祕寶厥文藏於東序此亦後世石渠
天祿之祖也禮虞戴德篇稱虞史伯夷則著作之庭
具矣豈祇登露壇月館以望三壺而元扈之閣稍黯
靈蘭之室易蠹乎

皇帝身服節儉之行以靖遠邇三方平均以為武莫神於元宮文莫大於冊府乃

詔朱斯栢譽之屬新之或獲或聖或竿或構樹之槐
皆尊之

天書赫赫昭昭

高宗之武蓋所以潤色

鴻業規文昌而觀萬寓傳曰舜在假典頌省闕遺此之謂也博史者古之所以與學校相資也

朝廷俊乂在官九德咸事厥左右之史疇弗欽攸司嘉慶己未以後科選庶常吉士至九十餘輩貢十之

卷一
歲儒臣乘軺傳行天下者十七八癸亥萃文學侍從
之官而明試之賦納以言三適乎駿異所以

訓天下曰儲材曰勵品者甚隆故人慎利而興義慎
德而興功而况

臨辟雍

御經筵數歲於茲矣直寬劉簡育子之義合五作十
道訓品之政親明目達聰闢門之風洽雖沈冥如雄
陶東不訖者猶將爭相翦拂待馭於勒軌若埴在埏
若金在冶是為

聖人之

教化及其將舉

上儀也

命掌故練日出太微入東壁先展謁於
先師穆然儲精獻誠思攬

孔佐之宏陳侔神明與之為列以表相

祖

宗贊揚迪括然後千品朝宗鷄鷄相從被璪火鬻黼
以奐之輯玉繒羔鴈以班之陳兩敦椀俎以嘉之移
衢尊芟脯以衍之賚琳琅纁組以繼之禮事彈樂情
究又有韋鼓練絃括隔鳴球七始九磬株離督陽之

舞謠雖鳥獸之鳴皆莫不延頸以聽餘律在內者皆
玉色在外者皆金聲洋洋哉傾天而蟠地也方且廣
聰燭幽訪務昭咨善卷清風協於元德淳化通於自
然仁飽德醉湛息汪濊

上下歡康色笑有睟豈不盛與

皇帝乃

勅時幾勤屢省偕百僚庶尹之倫永言依詠喜哉起
哉明哉良哉俾聯襜觀聽者偃僂詩書之門翱翔禮
義之庭肴覈六藝之林藪黼藻道德之藩屏尚憲群
雅未畢轡龍虎刊甃敲也

錫以銀篇玉字夫苞地符之與與海內為鉞槻昔黃
妣有卿雲之縵縵耳百工拜稽而和歌視元首股肱
之義若夸焉抑知其詞道和氣之明而及於萬姓允
誠配天之靈則奚異乎勅命而慎憲庸詎侈符瑞希
封禪也今

皇帝繼日月之且華以星陳雲爛為文章將

懷神珠握褒文應攝提久久逾光已夫軌迹夷易者
易遵垂統理順者易繼不遵則步馳隘不繼則景鑠
晦且帝者欲有所為必求其端於天奉天而法古道
以不愆粵羲和設節首演術於天元甲子若堯以仲

春遊河舜亦以甲子觀洛茲非虞汁月之一事與故
舜無為而治者無他主堯之道而已堯兢兢日行其
道而舜業業日致其孝

皇帝躬奉天經感物思慕肅肅祗祗一遊一豫靡事
不蹈

宗軌今週甲

大禮再興神人以暘猶之乎順堯攷德題期立象焉
猶之乎遊堯之門行堯之行坐見堯於牆食見堯於
羹焉故曰

聖之與

聖若規之相周矩之相儗也夫璇機玉衡觀天文以
察時序也四門穆穆觀人文以化成天下也孝經曰
則天之明以順天下其教不肅而成其政不勞而治
又曰事父孝故事天明然則

聖人之若古

聖人之

大孝也

聖人之

大孝

聖人之同

夫也有天公地公公之徒進曰

皇帝惟幾惟康萬機無曠類

帝裡宗望辯釐其儀悖庸觀象謚刑設其鵠親睦便
章叶和蕃其提律度量衡五器歸其樸猶亮章圖書
修禮秩宗伊九功歌敘昌弗勒玉版摛之無窮書曰
惟動丕應僕志以昭受上帝天其申命用休蓋興文
之應二儀光被出入日月罔不率俾宜宣

上德抒下情因採諸衢童壤父以播

天聲遂收百代之闕文補二典之漏逸被飾厥藝
舊六為七綴今方聞綴學之士數十萬言說一篇目

奚足以罄簡筆哉於是

天子憇然改容允執厥中執一無失行微無怠忠信
無倦形於四海食膏露飲醴泉調玉燭煦永風立於
櫺扉雲生燭坐於華殿松生棟雖面兩闕背墉垣髣
髴乎崔巍之冠蓬萊回巒之紫昆侖是以遊巖廊之
上不下席而天下治信乎其狹三王媿五帝也

聖駕臨幸翰林院禮成恭紀代作

雅四篇十六章謹序

臣某言翰林院者

國家所以右文尊儒之地也是故寵遇渥榮昭示慈惠所以文之以禮樂者其事優大

皇帝陛下仁覆八鴻義征不諛

舜干舞而苗頑格

湯鉞虔而苞耕殄區宇又寧役休務簡然後偃武興文并包書林汪汪乎丕天之大理嘉慶八年重葺翰

林院

詔以甲子春二月三日

車駕臨幸錫燕親王以下至庶吉士侍坐者二百人
盛禮興樂

賦詩賚予如乾隆九年故事臣謹案古者周道之隆
雅頌燦備自后稷以文德興其後世脩前業文王應
天命赫赫整旅以對于天下四方無拂迺作靈臺靈
囿靈沼靈臺者儒者說與辟廱明堂相表裏五經之
文藏焉察嘉祥書雲物太史之職脩焉文王身親臨
觀而知天下之歸附與萬物之得其所故詩曰經始
靈臺不日成之又曰王在靈沼於物魚躍其為法度

於天下也先脩飾其道施文章以為聖教故詩曰追琢其章金玉其相其時賢才蕃興官人無闕故詩曰濟濟辟王左右趣之及其式燕群臣既飲食之又實幣帛筐篚以將之上下交欣於旅也語述先王之道甚明故詩曰我有嘉賓德音孔昭武王繼統昭先人之功孚配命式下土故詩曰永言孝思孝思維則迄成王之世海內太平制禮作樂教學國之秀士選士俊士造士進士養之漸至於官之接以禮儀天下喜樂之於是有菁菁者莪之詩其君得賢者置之於位又以禮樂樂之則能基邦家綏眉壽於是南有嘉

魚南山有臺之詩其君含顯顯之令德以率由舊章則為四方之綱紀於是假樂之詩其君廣大有文章以致吉士與之以禮義相切磋則士皆媚於天子公卿常矢音以陳其志於是卷阿之詩周之所以作乎萬邦恢昭融之譽闡不匱之孝者用此也當是之時大有周召榮畢小有辛甲尹佚之倫胥能鋪張闋休銘諸金版藏之柱下以垂無窮我

大清之興也自

太祖雲雷經綸即崇儒臣綜典訓

太宗

世祖屢幸內院

聖祖

世宗賜宴瀛臺乾清宮禮數咸異

高宗以甲子之歲葺玉堂之署

帝車俯臨愷樂飲酒與諸臣歌以落之論經編史潤色鴻業則靈臺之遊觀不足侈鹿鳴之周行不足示也

皇帝宣重光龍緝熙啓迪鴻化榮鏡四表然猶尊履烝烝寅承謨烈紹文思奮懿鏘則下武之作求不足配有聲之適孝不足追也蕭灑轅纍龍光笑語斟酌

極於詞源有數依於藝藝則南山之萬壽不足多菁
莪之百朋不足喜也比年科選庶吉士輒八九十人
養之教之潤澤豐美

御書署翰林院二曰天祿儲材曰清華勵品樸以圭
璋之質齶以龍鷹之文則假樂之德音不足媚卷阿
之藹吉不足使也故惇誨故老言語侍從之司靡不
論思獻納抒忠孝而翊熙采煒我茂世之文章麟麟
馬與五三六經配雖周雅所掄也惡加茲乎臣愚嘗
供奉玉清馳驅星傳與東南汲古之士逖聽風聲以
為貞元之嘉運復見珠聯璧合於今焉臣不揣閭陋

竊循皇華靡及之義懷天保答上之誠謹獻雅四篇
凡十有六章庶以宣德詠仁云爾

擬擬者禾美育材也作人之化大夫士莫不惇
儒行焉

擬擬者禾生於美土自我天覆風之雨之其擾也殖
我汜布獲之以穎以粟以秭以銍以芬以秘以薦於
天室一章

蔚爾多士不樞厥秀曰攸好德

皇則受之秩秩書府翔雅之庭有閱其門有覺其楹
出日八月以泳游於方瀛二章

我求寶道於昭思文譽髦無斃燕詒後昆有菁彼秋
有藻彼春

皇曰儲材或桴或琴三章

昆侖之岡下有玲塹礪之砥之礚礚之力粲粲處子
其璞不壘維德之隅益于克損

皇曰勵品圭璋令聞是彝是訓于

帝其訓四章

春陽游翰林禮先師也師道尊然後德教廣也

春日載陽仲月吉亥禮園既開鸞輶既載金支庶旌
繁會方采玉河之渙鷁鷁鵠待

皇于觀文天閫無闕一章

瞻彼緇帷孔卓宛宛神之師保覺德以亶六拜祇祇
尊道無嫚如雕如鑄如大樽之灌念典惟學萬民所
觀孰登于岱孰觀于海遊聖之門毋敢不造二章
在歲敦牂

釋奠辟雍振鷺充庭祠于瞽宗七始華始於論賁鏞
禮樂之精靡鄉弗通允文在茲何階弗從毋輕一遊
物亦有容毋輕一獻

皇亦守盅三章

觥觥昌黎見道以文廓彼榛蕪先民之勤高山仰止

式時方聞馨之儒林如報榆枌有司盥薦舊典則云
我我奉璋髦士孔欣 四章

有蕢燕群臣也慈惠歡洽又錫予以榮之也

有蕢有蕢酒醴維醺斝彼金罍以承天涇秬稌在筐
燔炮在俎鳴玉有瓊紘紘維序登降拜坐式蹈且舞
具醉温温以綏多祜一章

振振麟趾于

帝受祉翬翬扈臣于

帝弼仔左右侍從維

天子使載笑載語攸喜攸起命彼惇史書之春紀二

章

琴瑟搏拊曼球吹笙隆平慶平中和被聲思樂文物
煒煒神京靖共爾位乃睠延英濃雲在霄為喬為卿
帝德光被象時文明三章

旨酒既觴筐篚是將

天子錫之織文七襄朱綠元黃璠璣琳琅旌乃含章
又何錫之玉簡緋組大園大槩繩是萬方四章

緝熙美文德也上歌下舞能宣前烈申景鑠則
天下文明矣

緝熙景命世有

聖皇陟降于天三辰在旁丕訓洋洋

烈祖攸行來游來歌肆覲

高宗之耿光我

皇紹之綵以天章萬吹一聲天風泱泱鸞鳳喑喑其
鳴歸昌一章

弓既櫜矣戈既包矣虎士敷矣魚麗告矣大哉作求
適追來孝率行天常敷貴典誥大人見龍君子蔚豹
穆穆明明重離繼照如彼翕河醞之灝灝如彼夷庚
九馘是表近

天子光無德弗藻匪其德藻

文命揆教二章

揆教維何

文思所授貞亮為繫禮義為繡丹青神化時乃聖黜
肴酌六學時乃漚滃鼓瑟謂何笙典在手颺賡謂何
心孚盈岳天經地緯重九巖九乾隆之前古未嘗有
周六十年化成道久先甲後甲嘉慶則又施億萬祀
率由茲舊三章

膚功有奕純懿有奭濟濟秉文思贊昭假金匱所藏
罔不探索天祐

聖清文獻自昔豈介彼符雀丹雘白豈侈彼絢鳧旌

赤帝河雒之壇匪飾我玉帛云亭之封匪榮我金石
馘馘德華對天於赫施億萬祀炳於瓊籍四章

聖駕巡幸淀津

閱視河隄恭紀

底績觀民說一篇

載 皇清文頴續編

皇帝御極之十有三年日宣重光峻德橫被辯章之
治臻醲懿之化暨爰始稽時巡之上儀周覽近輔轄
乎天津以纘述舊緒奠川底績省風觀民於是順
則之氓冥冥躡躡游乎康衢擊壤扣棘眄遵途之輿
衛瞻行棑與鈞陳奔協氣之布濩不自知其交壘而
歡欣也乃攜儔挈侶儼然造衢室大夫而詢焉曰蓋
聞天子穆穆在宮雖雖深禁嚴籞高乎九重攝官者
或不得通燕語備直者或不得闕儀容有息晏於司

契寧風示於匪躬今自我

聖主之撫方夏也法

天行健視民如瘼祈年報社則

南郊躬薦其齋重農勸功則東藉親舉其犂蝻蝻蝻
獲之中

欽勅乎時幾

綸言渙汗之出永念乎民依吾儕小人田疇廬井之
細飲食作息之微關宵旰之厯顧煩經畫於有司茂
不詳矣備矣乃又寅奉

先型審聽輿語遵般頌之規順陽和之序即次舍之

勤勞忘

宮掖之安愈雖曰一遊一豫為休為助顧

萬乘之勤不綦鉅乎鄙人固陋蒙不知述仰鏡高深願聞其說衛室大夫曰夫徂維求定者盛君之所以示惠而徧德也豫順以動者熙世之所以政清而毗服也蓋黃帝著迹於空桐顓頊列會於蟠木唐虞法再閏而肆覲周家度星終而循牧莫不觀納風謠廣求民瘼勞羅乎土波水石勤勞乎心力耳目雖道德太平恐遠近不同化幽隱有不得所必躬巡行之以叶時同律考禮正度歷世脩舉未之有改也洪惟

聖祖仁皇帝神契泰元動侔造化思艱圖寔罔敢豫
暇南涉江淮合符會稽東封乎岱宗西登乎五臺時
邁之轍發輒畿南

德車屢駐醇化旁覃洎

高宗純皇帝率時舊章勞謙故止

聖迹旁流江海如砥恢益地之圖陳握河之記循
翠輦所經行及

前皇之踵武後先一揆誕略可覩已

皇上紹庭繼序單心勅毖追維

列聖勤人之烈允寤思於攸受休畢既下

明詔咨禮官發帑藏飭繕完又復念疲眈之不足惕
浮戶之未安題期需象始勤和鑾所謂為人而行非
勞人以游觀懋脩隆禮丕天大律非夫譽臺之迹縣
圃之刺所得而同日也宣必恣穆於璇題淵愒於玉
英始克以延恩儲祉垂拱慶成哉順則之氓曰懿哉
帝者尊

天重民動不為身惟夙興以思潛隱故循行以牧人
孜孜懃懃之意既得而聞命矣昔者虞夏之世鴻陞
澤陂是以九功敘而九叙歌敢問功之可叙而可歌
者何若也大夫曰嘗聞之水火金木土穀謂之六府

正德利用厚生謂之三事六府三事謂之九功上有
舜禹之君下有益稷之佐灑沈澹蓄鮮秦艱播地平
天成府脩事和故九功之德皆可歌也夫水土演而
民用圯方水一土五惟遂均溝蕩防止瀦畜剝舍而
澮寫以涉揚其菱則水歸其壑土返其宅乃以粒我
烝民而頌聲斯作然則功有九而水土居其大端矣
故禹貢釐土績敷於瀦陂從道而三壤咸作乂也周
官職方名辨於川浸澤藪而九州同貫利也史起決
濁漳斥鹵是生稻梁白公穿谷口沮澤乃滿車篳兒
寬之鑿輔渠高邛賴其漫灌信臣之立均水隄闕明

於隰畔何則水者地之血氣如筋脈之流通宜導鬱而散滯或逆防而為患或順軌而為利如使填闕有法塢亭有術落渠因勢而寫潘渚因時而決則原隰之地皆為上腴名伯之埭鄭國之渠是也如使疏濬無方茨防無備延道弛而不脩鴻隙壞而不治則溢溢張決沈田敗禾蓄桑之浮黃鵠之歌是也蓋鍾水所以豐物導滯所以疏川民命所祖國以為天故王道公正脩明則百川理而落脈通誠經野之要務代天之熙功也且子亦知夫

帝畿之為疊園乎位應壬癸躔列箕尾當析木與漢

津乃山河之極委南道淇衛北受沽洵漳滏濟於
大陸滹沱散溢於陽武唐滏沙滋滌帶於豬龍淶易
濡聖注射於巨馬莫不洸潰於南北二泊滹滙於東
西二淀扼四爻而脈分導三角而股引桑乾之流濫
觴累頭通會於洪源漸厲乎于延鼓怒於麻峪之野
奔騰於落馬之川駛如竹箭滹滴善徙是名渾河古
號難理亦且歸墟於七十二沽而天津為之尾閭至
於千里一隄今厓擴壩偃亘於清淀濁河之間起良
鄉下固安包霸州而達永清以禦桑乾之漫由東安
徑大城迤文安而迄獻縣以格滹沱之湍起清苑跨

新安絡雄縣而薄保定以東涑易之潘架梁樹阪屹
焉翼焉蓋神京西北諸川所以源滌隩宅邈理東滙
係海水而朝宗者繫斯隄是賴我

大清之肇造丕基也稽覽坤靈考卜類謀規方太紫
爰宅於茲

聖祖神謨默運河伯輸靈親視子牙錫名永定

世宗宸居端拱簡任親賢別中亭改長洵開焦岡析
勝涉

高宗時勤乘載屢動玉瓊移越埏於條河聯格淀於
臺頭夷鹿曠之險灘籌鷹嘴以安流裁成變通因心

作矩工無隙而不周事有偏而必舉

皇上受

廟算素成規安瀾屢告不忘其咨斥大農之金錢披
司空之版籍侍亭水之薪芟儲緣隄之竹石立表程
度撫畫形勢審防察理平繇量事役不稽時而功用
成費不外徵而民用宣行旅懽於周塗農忙怍於新
畝蹈德詠仁徐徐于于延頸企踵以望

乘輿於是

聖主乃勤大路遵

皇衢考政教之劇易覽川原之有無既有以慰兆庶

之懇誠恤羣工之勤劬猶憲方春農時

經臨縣郭有司或有所徵發以妨東作嚴飭扈從禁
苞苴絕竿牘減膳辦之數申稍餽之約誠置吏毋得
絡繹探伺動煩供億其治道儻役官支水衡償其直
所隸

帷宮行殿久弊者黜堊補葺勿庸有所更建方達聰
博觀熙然與百姓相見雖下里顛蒙僻壤侗穉亦各
晏然粲然喻曉意指夫卑宮菲食而溝洫是力夏后
氏之所以出律度昭疊穆也日昃不遑暇食而康田
是即周先王之所以迪懿恭安卑服也綜六藝而考

德則百家不足議其履憲法八世而慎微則三五不足式其儀典惟是

列聖之所經營摩畫吾

皇靡不揆而脩之故隄防升踐之必周也

列聖之所繹思勤恤吾

皇罔不翼而成之故慶惠宥青之必行也秩羣神而懷柔之禮備旌廉能而審官之制得問高年則粟帛之頒逮簡戎伍則糈食之

詔沛租復蠲予以嘉力田給札試言以徠俊民稽工賈以責事實而節度乃克用謹省方土以去奢泰而

風俗乃盡返淳區宇之內懷生之類莫不煦嫗乎至
仁蒸濡乎和會詩不云乎邇求厥寧邇觀厥成言能
恭祖舊之法以降德於億兆民也又曰匪棘其欲適
追來孝言能合庶彙之心以仰答乎前寧人也

聖主求寧觀成無逸作所斯以從欲追孝允答

昊天之祐其詒謀也不已燕乎其錫類也不已徧乎
若夫

聖德淵懿繼

天迓衡以襲烝昭貺升中告成者弁識罔究蔑得而
名焉於是順則之氓飲淳舍和飫義飽德相與舞詠

皇風樂世世而無極

卷一

三

擬敬緝

兩朝東巡詩恭跋代

臣聞帝出乎震必溯肇基之迹人本乎祖必隆崇報
之又是以濬哲維商啓元王之桓撥生民配稷源邵
室之康裡洎乎松柏陟山景員受命玉璠在嚙函居
允荒式廓日增詒謀逾遠在天篤枯則綿世卜昌肆
夏時巡則釐風歸厚

清興大東代顯

神括舊邦新命緯熙重光衍宵壽邱璠樞有繞電之
瑞積祥若水珠斗叶流虹之慶梧野煙雲之地為劔

鳥之所式憑穀林風雨之鄉乃雲雷之所締造柝棧
斯拔作邦

帝省之山董荼如飴胥宇周原之土迄白旄一麾黃
鳥底定正域四方奠鼎京邑創業之國厥躋留都增
設祠官嚴奉

陵廟昭嗣服之維則鞏繼序之永圖所以隆上都而
觀萬國覲耿光而揚大烈昔在

高宗純皇帝四詣陪京恭纂

祖舊

聖作丹青星陳雲爛

義詠舜歌稠疊美富蓋以為國家固不拔之基萬世
頌無疆之祐焉

皇上自宅位以來執至德要道以順天下惇睦辨章
橫被四表十年

東巡祇謁

三陵上以篤慶錫羨答

列祖

列宗陟降左右之眷下以省方設教觀一民一物敦
厯純固之遺誠

聖人孝治天下之本而聰聽彝訓之實也若乃筵几

登依用乾執豕之風燔柴禋燎庶縣浮沈之典司儀
贊朝有圭璧羔鴈之受焉司正式燕有承筐鼓瑟之
將焉萬樂備百禮暨爰又習射上功獮田數獲椎髻
納珍旃裘來享震疊之武攸張變諧之化彌邇於是
御行殿發

綸詔散太極之泉福無方之外薄海蠲租高年

賜帛大矣孝熙中外同慶懿哉鑠乎靡得而罄已稽
古猗那長發思文清廟之作揄揚盛德殷薦祖考時
邁車攻之歌巡守崇望會同有繹旱麓皇矣瓜瓞公
劉之篇推原世德配京之自行葦蕘鷺湛露鹿鳴之

什以嘉樂宗戚臣工南有嘉魚南山有臺由庚由儀
蕤蕭之詠以樂育衆賢澤被萬物雅頌所陳祭乎隱
隱

皇上孝思不匱善繼善述

天藻昭垂規重矩嚴方且義極如存道思維則自今
以往習祥卜吉顯德仔肩施於億萬萬祀豈直區區
三侯歌風天子協樂而已哉臣謹彙次

兩朝之制作緝成一編以明適駿有聲洽前文而光
下武請令藻被金石垂示無極天下幸甚

廣東鄉試錄後序

嘉慶九年夏五月十有五日奉

命廣東考官遣臣壽祺副臣嵩慶以往伏念臣瀕海
鯨生學殖荒落由嘉慶己未科進士改庶吉士辛酉
散館

授編修是秋請假歸癸亥季冬乃還

朝供奉之日淺方惕惕然恐瘵厥官乃獲輒預文衡
感激

息榮惟以弗克勝任是懼即偕臣嵩慶馳抵廣州如
期入闈率同考官悉心校閱得士如額謹擇其文尤

雅者進呈

乙覽臣例得綴言簡末臣竊惟古者大比賓興考其德行道藝而勸之今之科舉之文未嘗不以藝而勸進乎道也古者語於郊者必取賢斂才焉或以德進或以事舉或以言揚今試士之經義詩策問未嘗不以言而勸勉乎德與事也其有根於心聲湛浸於經術擇言典訓掇菁英而翦榛楛者則其為人必出入不悖所聞矣有其文無其行雖獵弋科名與以詩禮發冢何異而况其行既詭即其文亦安免骯髒不中法乎夫文以足言言以足志志正而後言順言順而

後文明易曰修辭立其誠誠者不自欺其志之謂枝
多游屈之辭非誠也剽勦雷同之辭尤非誠也枝一
日之藝其辭之誠否雖難盡決然國家以此取士士
以此進身則所以辨之者亦必有道矣漢世選舉不
廢課試然當時經學有家法而義理明清議在鄉黨
而廉恥興若揚孚以賢良上第董正以學行知名固
嶺南文獻之祖也唐韓愈於趙德之能督潮州學生
徒也稱其心平行高於區宏之勤苦從學也最其業
成志樹二者皆見愈所為詩古人師友文字之間所
相為勉厲者若此臣謹推原此意夙夜兢業殫竭心

力區區之愚實願甄拔二三實學而不徒以言俾多
士咸知因文而考行以求無害乎詩書仁義之源庶
幾於

聖天子譽髦無斁之道少副萬一歟

河南鄉試錄後序

嘉慶十二年秋七月奉

命河南考官以臣壽祺副臣士彥往典厥事臣濫竽
詞館學識迂踈前甲子鄉試仰蒙

聖恩俾臣校士嶺南矢心殫力懼弗能報稱

知遇今復充使中州感悚奮厲何可言喻即偕臣士
彥馳抵開封如期入闈密勿夙夜得士如額擇其文
尤雅者恭呈

乙覽臣例得綴言簡末竊惟聖人之道散見諸經發
明章句始於子夏子夏衛人也然則祖述經解固宜

盛於河洛之間矣古者三十而五經立故試士之法
莫先於經義漢時明經皆試家法汝南大儒許慎深
明訓詁所撰五經異義臚今學古學諸家之言而折
衷之體例與劉向五經通義相近蓋恐課試業衰古
學不明使學者辯章舊聞不至墨守一家之言蔽而
不知所通其有功經術甚偉陳留蔡邕閱五經文字
多謬俗儒穿鑿請刊石太學以示準則其所書經皆
用學官見行之本然今以殘字存者攷之公羊尚載
嚴顏異同之說論語尚記盍毛包周有無之文則非
專已守殘章章矣後人苟安固陋以古學為不可復

以科舉之文為本末不必相符不知如漢之賈誼袁
安唐之韓愈姚崇宋之韓琦富弼學貫天人黜施彝
鼎昌嘗不以經義策對詩賦之文颺言於丹扆垂聲
於紫微乎道學之興倡自濂洛夫舍經術無以為儒
林舍儒林無以為道學使周邵二程就科舉之業其
文章爾雅深厚焉有不約六經之旨而成者哉是故
學者非稟經不足以修詞試士者非宗經不足以立
軌育材得賢胥于是乎取

國家人文化成廣厲學官之路中州接軫
畿輔風教日新所以被飾厥藝猶將漸至於古之大

賢言壇而行坊玉楨而金幹豈區區文詞之工而已
此則尤臣之愚所求上無負

天子委任之意下亦以對此邦人士之望者也

請以明儒黃石齋先生從祀 孔廟狀

具僉呈在籍翰林院編修陳壽祺等為乞疏請以明儒從祀

文廟事竊維明儒漳浦黃道周行完忠孝學貫天人著述本於六經節義興乎百世建言直諫斥佞黜邪百折不回九死無悔自責以三罪四恥與稽在九串十朋心可質於明神道允成乎仁者作易象正三易洞璣以推象數作洪範明義以格君心作月令明義以致時政作孝經集傳以補朱子刊誤所未備作坊記表記緇衣儒行集傳以發二戴禮記所未言鈞深

探蹟洞徹古今誠天德之津梁治道之樞轄及其被
讒繫獄猶詮義經蒙難捐軀詠歌弗輟執德信道樂
天知命浩氣足以塞天地正性足以扶綱常其德業
在梁溪考亭之間其志節在文山青陽之列垂諸史
傳炳耀千春我

朝至德并色表揚忠烈凡勝國殉節名臣罔不
特加追獎乾隆四十一年道周蒙

予專謚忠端尋復採其遺書著錄 四庫伏讀

高宗純皇帝聖諭劉宗周黃道周立朝守正風節凜
然奏議慷慨極言忠蓋溢於簡牘卒之以身殉國不

媿一代完人大哉

綸言榮於華衮我

皇上論道上庠尊賢西學道光二年嘗

俞臺臣之請以劉宗周從祀

文廟西廡列於明臣蔡清之次所以旌嘉前哲風示
士林竊稽明代自王守仁提倡良知之說末派盛談
心學流於冕漾冥虛宗周自浙道周自閩匡而直之
粹然一出於正道周講學餘杭大滌山及漳浦鄴山
跡其明誠堂之問業以主敬為歸正學堂之發端以
格物致知為的樂性堂之立教以克復歸仁為師三

近堂之會友以好學力行知恥為嚴發明聖學衛道
宗經規模博大功力宏深而大指要與宗周相近是
以榕壇戢山並峙宇內非獨出處節概兩相頡頏今
宗周既崇祀西廡道周宜併請列入從祀以彰名臣
之軌範樹儒宗之圭臬正人心而維世教翼聖道而
勵貞修實有光於

國家庠序馨香詩書俎豆之典壽祺等謹合詞籲懇
疏詩

宸崇輿論孚洽天下幸甚切呈

附閩浙總督趙 福建巡撫孫

奏為請以明儒從祀

文廟恭摺奏 聞仰祈

聖鑒訓行事據福建在籍紳士編修陳壽祺等僉呈
稱明臣黃道周行完忠孝學貫天人著述本於六經
節義興乎百世其發明聖學衛道宗經大指與劉宗
周相近今宗周既崇祀

文廟道周宜併請從祀等因臣等查明史黃道周傳
贊稱其指陳深中時弊足為萬世龜鑑

御批通鑑輯覽紀其學行推重於天下乾隆四十一

年

特賜專謚忠端伏讀

高宗純皇帝聖諭劉宗周黃道周立朝守正風節凜然其奏議慷慨極言忠蓋溢於簡牘不媿一代完人欽此臣等竊惟道周碩學清操孤忠亮節其生平著述尤富四庫採錄其書多至十種皆闡明經旨推究治道囊括大典體用兼賅而最湛深於易經孝經雖在獄中猶草易圖六十四象正手寫孝經百有二十本可謂篤於信道熟於成仁其講學浙閩罔非以明道翼經崇正闢邪為己任榕壇開業一書考古證

今探微抉奧發端以格物致知物格知至為第一要義蓋宗周以誠意為主而歸功於慎獨能闡王守仁之緒言而採其流弊道周以致知為宗而止宿於至善確守朱熹之道脉而獨遡宗傳

聖訓煌煌相提並論誠為千古定評
皇上昌明正學崇獎儒林道光二年

俞臺臣之請以劉宗周從祀

文廟列於西廡明臣蔡清之次伏以道周與宗周臨危授命大節既相接跡正誼明道學術亦復比肩似宜俯如紳士所請併列兩廡之祀以維世教以勵貞

修用彰

國家惇崇庠序表樹風聲之至意茲由藩臬兩司據呈具詳前來臣等謹合詞恭摺具奏伏祈皇上聖鑒勅部核議施行謹

奏

道光五年四月初八日准

禮部咨臣等查康熙五十四年題准以宋儒范仲淹學問精純經綸卓越從祀

聖廟位列東廡唐儒韓愈之次雍正二年遵

旨議定以縣廩牧皮樂正子公都子萬章公孫丑漢

諸葛亮宋尹焯魏了翁黃幹陳淳何基王柏元趙復
金履祥許謙陳澔明羅欽順蔡清

本朝陸隴其二十八人增祀

文廟乾隆二年以元儒吳澄復祀太學在東廡元儒
趙復之次道光二年三年節經遵

旨議准以明臣劉宗周從祀西廡列明臣蔡清之火
以

本朝臣湯斌從祀東廡列明臣羅欽順之火各在案
伏思先儒祔饗

廟庭必其人扶持名教羽翼

聖經有關學術人心始能升諸從祀之列典至鉅也
茲查明史黃道周列傳暨乾隆四十一年

賜謚原案道周籍隸漳浦歷官少詹事忠言讜論守
正不阿中遭貶黜矢志不移卒能致命成仁完名全
節明史傳贊稱其指陳深中時弊足為萬世龜鑑臣
等復恭繹

高宗純皇帝諭旨褒其立朝風節不媿一代完人

聖訓昭垂誠為千古定論至其生平講學浙閩以格
致為宗而歸宿於至善與劉宗周之以誠意為宗而
歸本於慎獨學術洵為相等雖其講明象數亦猶邵

子先天之學可與程子易傳專言義理者並行實與
聖經有裨足為後學師承是其亮節孤忠早樹楷模
於史冊正誼明道復標圭臬於儒林應如諫督等所
奏准其從祀

文廟東廡在明臣羅欽順之次以崇儒術而闡幽光
所有臣等核議緣由是否有當伏祈

皇上聖鑒

訓示遵行謹

奏道光五年二月十六日

奏本日奉

旨依議欽此